



INFORME DE LEGALIDADE SOBRE O PROXECTO DE ORDE POLA QUE SE MODIFICA UN DOS FICHEIROS CREADOS NA ORDE DE 1 DE DECEMBRO DE 2010, POLA QUE SE REGULAN OS FICHEIROS DE DATOS DE CARÁCTER PERSOAL EXISTENTES NA CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA.

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, en relación co proxecto de Orde pola que se modifica un dos ficheiros creados na orde de 1 de decembro de 2010, pola que se regulan os ficheiros de datos de carácter persoal existentes na Consellería de Presidencia, Administracións Públicas e Xustiza, emítase o seguinte:

INFORME

1. Marco normativo e competencial

A Lei orgánica 15/1999, do 13 de decembro, de protección de datos de carácter persoal (BOE núm. 298, do 14 de decembro) regula o tratamento de datos de carácter persoal rexistrados en soportes físicos, que os faga susceptibles de tratamento, así como toda modalidade de uso posterior destes datos polos sectores público e privado. A finalidade desta regulación é garantir e protexer as liberdades públicas e os dereitos fundamentais das persoas físicas, e especialmente a súa honra e intimidade persoal e familiar.

O artigo 20 da devandita lei dispón que a creación, modificación ou supresión dos ficheiros das administracións públicas só se poderá facer por medio dunha disposición xeral, publicada no BOE ou diario oficial correspondente, e establece no seu punto segundo as indicacións concretas que deben constar nas disposicións de creación e modificación daqueles.



Para dar cumprimento a este precepto, publicouse a Orde de 1 de decembro de 2010, pola que se regulan os ficheiros de datos de carácter persoal existentes na Consellería de Presidencia, Administracións Públicas e Xustiza.

A citada Orde do 1 de decembro de 2010 foi obxecto de modificación por medio da Orde do 7 de xaneiro de 2011, pola que se modifica a Orde do 1 de decembro de 2010 pola que se regulan os ficheiros de datos de carácter persoal existentes na Consellería de Presidencia, Administracións Públicas e Xustiza.

2. Necesidade e oportunidade

A evolución da actividade administrativa no ámbito da Xustiza e as características específicas que concorren na Dirección Xeral de Xustiza, respecto doutras unidades da Consellería de Presidencia, Administracións Públicas e Xustiza, lévanos a modificación do ficheiro “Imelga” para adaptalo, o que obriga tamén, conforme á citada Lei Orgánica 15/1999, do 13 de decembro, de protección de datos de carácter persoal, á modificación da Orde de 1 de decembro de 2010.

3. Estrutura e contido

Este anteproxecto de orde está formado por 6 artigo, unha disposición derradeira e un anexo co seguinte contido:

Artigo 1: obxecto

Artigo 2: contido

Artigo 3: finalidade e uso do ficheiro

Artigo 4: cesión de datos

Artigo 5: órgano responsable do ficheiro

Artigo 6: nivel de protección e medidas de seguridade

Disposición derradeira: Entrada en vigor

Anexo: ficheiro que se modifica



4. Tramitación

Polo que respecta á instrución na elaboración do proxecto normativo, esta acomodouse ao procedemento legal e ás prescricións contidas nos artigos 40 a 44 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia.

O centro directivo impulsor remitiu á Subdirección Xeral de Réxime Xurídico o borrador da disposición acompañado dunha memoria xustificativa sobre a súa legalidade, acerto e oportunidade (artigo 41.2.a) da Lei 16/2010, do 17 de decembro).

Así mesmo consta o acordo previo de inicio na elaboración da dita disposición asinada pola persoa titular da Vicepresidencia e Consellería de Presidencia, Administracións Públicas e Xustiza (artigo 41.1 da Lei 16/2010, do 17 de decembro).

Unha vez recibida a documentación e logo do seu estudo, o Servizo Técnico-Xurídico da Subdirección Xeral de Réxime Xurídico, elaborou o preceptivo informe e obtivo a aprobación inicial do anteproxecto como proxecto pola persoa titular da Vicepresidencia e Consellería de Presidencia, Administracións Públicas e Xustiza (artigos 41.2 c) e 41.3 da Lei 16/2010, do 17 de decembro).

Unha vez aprobada inicialmente a disposición como proxecto, este publicouse na páxina web da Consellería, na relación dos procedementos de elaboración de disposicións administrativas de carácter xeral que estean en curso, indicando o seu obxecto e estado de tramitación, así como a posibilidade que teñen as persoas de remitir suxestións e a forma de facelo (artigo 9 da Lei 1/2016, do 18 de xaneiro, de transparencia e bo goberno e artigo 41.4 da Lei 16/2010, do 17 de decembro). Non se recibiu ningunha alegación no devandito prazo.



A continuación o Servizo Técnico-Xurídico solicitou os informes dos órganos e unidades administrativas que deban pronunciarse sobre o texto do proxecto.

Resultou preciso solicitar un informe económico-financeiro da Consellería de Facenda, o informe da Axencia para a Modernización Tecnolóxica de Galicia, e un informe sobre as cuestións de legalidade e técnica normativa da Asesoría Xurídica.

Por tratarse dunha disposición administrativa de carácter xeral que puidera ter repercusións en cuestións de xénero, ao abeiro do artigo 8 da Lei 7/2004, de 16 de xullo, galega para a igualdade entre homes e mulleres e do artigo 42.2 da Lei 16/2010, do 17 de decembro, resultou preciso requirir informe sobre o seu impacto de xénero.

O 2 de agosto de 2016 a Dirección Xeral de Planificación e Orzamentos emitiu informe favorable sobre o proxecto de orde.

O 20 de xullo de 2016 a Secretaría Xeral de Igualdade emitiu o preceptivo informe sobre o proxecto de orde.

Con data 26 de xullo de 2016 emítese o informe da AMTEGA no que se realizan unha serie de recomendacións ao texto do proxecto, as cales son recollidas na súa totalidade no texto final do proxecto de orde.

Finalmente, o 25 de agosto de 2016 a Asesoría Xurídica emitiu informe favorable sobre o proxecto de orde, se ben facendo unhas observacións acerca da necesidade de substituír as referencias á Consellería de Presidencia, Administracións Públicas e Xustiza pola Vicepresidencia e Consellería de Presidencia, Administracións Públicas e Xustiza



5. Legalidade.

En cumprimento do disposto no artigo 43.4 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, o proxecto someterase á aprobación da persoa titular da Vicepresidencia e Consellería de Presidencia, Administracións Públicas e Xustiza.

De acordo co indicado, e logo da proposta elevada pola Subdirección Xeral de Réxime Xurídico, considérase que este proxecto de orde reúne as condicións esenciais para a súa aplicación e efectividade polo que se informa favorablemente o mesmo.

Santiago de Compostela, 29 de agosto de 2016

A secretaria xeral técnica da Consellería de Presidencia, Administracións Públicas e Xustiza

Beatriz Cuiña Barja